



Mohamed Aqil Azmi dan Zad Chin Qi Qi akan menjadi sebahagian daripada kelas sarjana Universiti Harvard bagi 2024.

Dua pelajar Malaysia ke Harvard 2024

Kuala Lumpur: Satu lagi pencapaian membanggakan buat Malaysia, apabila dua pelajar muda, Mohamed Aqil Azmi dan Zad Chin Qi Qi, bakal ke Kolej Harvard; sekolah sarjana bagi Universiti Harvard yang terkenal di seluruh dunia.

Kelab Harvard Malaysia menerusi kenyataan semalam, berkata kedua-dua pelajar itu akan menjadi sebahagian daripada kelas sarjana bagi 2024.

Katanya, Mohamed Aqil, 20, anak kelahiran Shah Alam, Selangor; bakal mengambil jurusan Matematik dan Falsafah, manakala Zad Chin, 20, pelajar perempuan dari Ipoh, Perak, merancang mengambil jurusan Sains Kom-

puter dan Pengajian Sosial.

“Kedua-dua pelajar pada masa ini sedang mengikuti pengajian A-Level di Kolej Yayasan UEM di Lembah Beringin, Selangor.

“Mohamed Aqil dan Zad Chin akan memulakan pengajian peringkat sarjana mereka apabila Kolej Harvard dibuka semula bagi tahun akademik yang baharu,” kata kenyataan itu.

Menurut kenyataan itu, terdapat 40,248 permohonan untuk memasuki kelas pengajian Kolej Harvard bagi 2024, namun hanya 1,980 pelajar diterima masuk dengan hanya 10.8 peratus pelajar antarabangsa.

Kali terakhir pelajar Malaysia diterima masuk ke Kolej Harvard adalah pada 2017. **BERNAMA**